

重修天津府志
(光緒)
六

ISBN 988-978-316-9



二〇〇六年三月

中國海疆舊方志

選題組織策劃：蝠池書院出版有限公司

發行者：蝠池書院出版有限公司

出版者：蝠池書院出版有限公司

香港九龍旺角花園街二十六號好景商業中心二十三樓二三〇九室

電話：〇〇八五二一六五五九二三七〇

傳真：〇〇八五二一三三八七九〇〇

定價：人民幣 九五〇〇〇元（全書共三百一冊）

重修天津府志卷二十五

考十六

輿地七

寺觀

天津縣

海光寺

在南門外康熙四十五年建初名普陀

寺五十八年

賜廟額曰敕賜海光寺

賜正殿額曰隨處潮音

賜正殿聯曰水月應從空法相天花故落映星龕

前志宋師會海

光寺賦序節錄海光寺者湘公上人所住持也歲在丙戌天津總鎮藍公開水田於南門外創普陀

一光緒戊戌

寺延上人爲方丈主於時大殿未完閣甫立柱席未煖而藍公陞任於閩工程中止上人以機緣未至冷坐一室者十年丙申余備員運使閒過其地憫其日頽月廢始爲之建山門完大閣戊戌爲之築墻垣謀廊廡已亥爲之開河取土以崇寺基恭遇

駕幸西淀上人以扁舟迎謁奏對稱旨賜紫賜額於是直隸制府趙公守道李公津道朱公分

司杜公皆仰體

聖心踴躍抒誠鳩工卜日不終歲而凡叢林所應建者無不備舉金碧輝煌規模鉅麗天下皆知有海光寺焉辛丑啟建道場奉有鹽法道瞻禮之旨九十日勝事彌天懽聲動地余就寺之所有目之所見作一賦以鋪揚太平之盛

乾隆閒

賜正殿額曰普門慧鏡

賜正殿聯曰覺岸正光明如水如月法流大自在非色非

空

賜寺內

御書樓聯曰春物薰馨含慧業名禽宛轉入聞思

賜寺內大士樓聯曰不生波處心恆定大寂光天相總融
賜寺內後樓聯曰歡喜白毫光妙明合印莊嚴香水海安

隱同參有

御製詩石刻

恭載卷四

嘉慶閒

賜正殿額曰慈照圓容

賜正殿聯曰法相總持通海會性空無盡發天光

縣志

孤雲寺

在城外舊名白廟康熙四十八年

賜寺額曰孤雲寺

前志

寺觀

般若菴 在城西梁家嘴康熙間

賜額

賜聯

蔡啟盛案此菴僅見縣志且云有

仁皇帝賜聯額而查其恭紀

天章中又失載今詣訪見

御筆額爲清素二字楹聯則已無矣

望海寺 在城外河北岸前志乾隆元年巡鹽御史

三保題請重修

縣志

賜正殿額曰瀛壖慈蔭

賜正殿聯曰普度指通津慈航示喜眞如參覺海法界超

塵

以後殿額曰海藏持輪

賜後殿聯曰證彼岸恆沙視茲喻筏滙衆流一滴笑與拈

花有

御製詩石刻

恭載卷四

嘉慶閒

賜正殿額曰鏡流法喜

賜正殿聯曰滴水悟三乘妙參筏寶大瀛收一覽慧徹珠

圓

縣志

崇禎觀

在望海寺旁

采訪冊

乾隆閒

御書廟額曰敕賜崇禎觀

御書正殿聯曰詆蕩玉閭開監觀有赫穆清香案仰廣運

無爲有

御書崇禧觀三字碑有

御製詩石刻

恭載卷四

嘉慶閒

御書正殿額曰高穹咫尺

御書正殿聯曰閭闔啟通明氣調玉燭鴻濛肇宗動瑞應

璣衡

縣志

福祐祠 在水師營新城乾隆閒

賜正殿額曰雲海香臺

賜祠內水母殿額曰資生廣潤

賜祠內關帝殿額曰神昭赫濯

賜祠內關帝殿聯曰凜正氣浩然準茲溟渤式靈威儼若

壯我干城

縣志

通眞道人祠

在院署大樓後同治八年

賜額曰玉清福祐

俱同上

大佛寺

一在大沽水師營雍正七年水師營都

統拉錫奏建

前志

一在東門外河東明崇禎二年

重建

湧泉寺

一在南門內

一在大直沽

一在小

直沽明宣宗征樂安州渡此賜金幡二正統十年

漕運參將湯節重建

俱同上

明程敏政重修天津湧泉寺記我文廟入靖內

難自小直沽渡蹕而南名其地曰天津置三衛以
守則永樂甲申也都北以來兵備加嚴地重事殷
無所責成乃弘治辛亥置按察副使一人奉璽書
專理置司天津巴渝劉公首被推擇而來適百度
之弛也久公悉厥心以次修舉爰先事城櫓次及
閱武場次及學宮不三四年皆告厥成公以每年
聖旦令節及元會長至四大禮必先習儀於所謂
湧泉寺者寺止舊堂十有二楹卑陋弗稱且其前
地狹容僅百人講肄禮文多不能如式方岳入觀
者前期及此或拜於舟中展敬而已莫可致力公
惕然曰是非守土之責哉乃募工鳩材拓地若干
步值他寺在令甲當廢者三悉撤而用之湧泉一
爲前殿一爲伽藍殿而移舊堂於後爲具服所僧
舍則聽築於垣外由是習儀之際陞墀高廣宮宇
靚深儀衛具陳冠裳就列儼乎若六龍當御八佾
在縣典謁者有所藉而周旋入覲者咸得與事而
免於苟簡觀者嘖嘖知禮之當肅也若此於是三
衛具寮書來京師請予記惟公治天津總一道兵
刑之任而無利權可展布乃能節縮浮費修城浚
隍簡戎器剏樓櫓興文教使橐韃之士兼俎豆之

習屹然京師一巨屏又以其暇日新茲梵宮示人以禮其施之有序其爲之有法惡可不書之告來者俾謹嗣之而毋忘斯役之自哉或疑釋氏之宮非吾人所當起廢似又不然彼徼利於鬼神破吾民之財力爲異教者倡是誠舛矣今所葺者特藉此寬閒清寂之境伸遠臣敬上之至情其奚不可之有昔韓子謂浮屠氏有慕吾之道者拘其法而未能力入今卽其地與其庭修禮樂之容明上下之等設贊相拜起陟降進退之節秩乎粲然先王之制而昭代之所因也安知不有如韓子之說可化其徒使歸於中國聖人之教者哉是亦可書公名福字順夫起進士甲科屢更中外以公勤練核著稱一時是役也董之者指揮周燦千戶唐玉佐之者指揮倪雄黃溥呂昂裝繪諸梵佛像者土人張俊民季興張安而主是寺者釋悟懷也法得附書

白衣菴

一在城東南隅康熙四十七年重建俗

名大寺

前志

一在城內東北隅

縣志

光緒戊戌

白衣寺 在北門外河北岸明正統七年建名觀

音寺 前志

國朝順治十七年重建改名白衣寺 同乾隆間大學

士于敏中鹽運使吉虛中天津道宋宗元重修 縣志

白衣廟 一在河岸 一在楊柳青河北 俱同上

甘露寺 在北門河北岸明季建

國朝順治元年重修 前志

育德菴 在西門外瓜菓店河岸明季建

國朝順治六年重建

稽古寺 在西門外西北隅明萬曆七年敕建

國朝康熙三十八年重建有藏經閣

俱同上
尊天津衛稽古

寺重修藏經閣記佛之書入於中國其初四十二
章耳其後盛於姚秦熾於梁大備於唐代興日繁
幾與儒者之書相等緇紳學士靡然舍已所學從
之而其徒復侈大其事鳩土木以爲之宮飾朱丹
以爲之桷誦焉則有拜跪坐起之容梵焉則有抑
揚高下之節而又緇繩以襲之鐘鼓以宣之其所
以崇奉之者靡不至自孝定皇后篤信其教命中
使頒經藏於梵刹其徒猶慮未廣更梵策爲篇籍
自是經藏薄海內外所在多有嗚呼使遇漢明梁
武又可知矣天津衛屬京畿之衝城之西門有稽
古寺藏經之閣峙焉地近海多風飛沙晦冥歲未
久閣圯浮屠含光者新之予機舟道此登焉夕陽
在衣風鈴錚然翔鳥上下爲之目曠心怡含光語
予曰凡吾材之所需井稅之入升盎之儲積之累
年始成焉憚閣之頽而經藏將失也今緇紳學士
誦法周孔其於六經百氏之書舊聞放失往往置
勿問而府州縣學或傾廢不治不有愧於佛氏之
徒也哉浮屠之言雖非聖人所與而能崇奉其教

以興廢自任若舍光者殆亦聖人之徒之所進也遂爲文以記之
光緒十三年知

府汪守正改寺爲書院

采訪冊

慈惠寺

在西門外姚家灣明崇禎九年重建前

志

鎮海寺

在城東大直沽明崇禎二年重建

慶國寺

在城東大直沽池南一名掛甲寺

明劉生中

重建掛甲寺碑記大直沽池南三里許有古刹曰慶國寺後名掛甲其由來遠矣圖經無考得於父老傳聞云當大唐征遼奏捷駐師此寺因更名焉世遠傾頽遺址尙在今遊擊將軍張良相奉命東討日本國道經於斯嘆曰余將凱旋而亦掛甲於此焉督本營千總官袁應與等率隊伍蘇敬等各捐貲興工踴躍從事天津廩生孫從先捨地十畝協力重建不兩月而底績棟宇嵯峨象設赫濯遐邇士女瞻謁雲集隨祈隨應旣而東倭蕩平旋師掛甲神其有赫乎不佞因摭其始末劖之於石以

諗來者云

無量菴

在北門內康熙五年重建

大悲院

在北門外河北審窪康熙八年重建

俱同

上朱彝尊大悲院記孔子歿百氏之學興其最盛者楊朱墨翟治墨氏之學者至分爲三其師說之不傳豈非孟氏闢之也與浮屠之言近乎墨者也墨之教摩頂放踵利天下爲之而獨於治喪也以薄爲其道爲浮屠者術主乎慈其始去父母昆弟捐妻子而不顧詎非忍哉昔孔子不遇於時馳驅四方若微生畝接輿荷蕢之徒交訕其後而曰吾非斯人之徒與而誰與痛哉其言也蓋吾觀於佛獨善彼所稱觀世音菩薩者推其願所至欲盡斯人而登之善其去孔氏之旨不遠而大悲菩薩者彼所謂觀世音之化身也其手足之數多至八萬四千目必有所運手必有所執俾匠人一肖之佛氏之教則然禪人世高結茅天津之衢夏以水冬以茗果施往來之人而予友曹君實司武備

茲土捐俸錢繼之程工庀材築室三楹題曰大悲
禪院而請記於予嗟夫舉斯世之人其可惻然悲
者衆矣惟泯於無所睹聞則已試游目而觀其迷
途陷溺目不能周手不能援者何限此菩薩之以
大悲名也而况聖人之心哉曹君勇而好文馭兵
以嚴而養民也惠殆所謂可使治賦者也夫浮屠
之言儒者疾之以其無預於世天下飢溺而不思
所以救也世高用其師之說獨以大悲菩薩自託
則豈盡無意於斯人者哉宜
曹君之樂其人而信其道也

直指菴

在北門外河北審窪康熙八年重建

前志

大寺

一在桃花口明隆慶二年重建

同上

一在城

南峰兒窩舊名觀音菴明代建

縣志

先登寺

在北門外東北隅河北岸康熙三十五

年重建

前志